

Održan radni sastanak Službe za zapošljavanje ZDK sa premijerom, predstavnicima resornih ministarstava i udruženja poslodavaca ZDK

Kao nastavak dinamične agende aktivnosti JU Službe za zapošljavanje ZDK a pod rukovodstvom direktora/ravnatelja Marinka Kelavića, u sali Službe, u ponedjeljak 01.02.2016. godine, održan je radni sastanak na temu „Poslovna saradnja između Službe za zapošljavanje ZDK i šefova biroa sa relevantnim subjektima iz privrede i vladinih institucija u svrhu smanjenja nezaposlenosti”. Na sastanku su prisustvovali premijer ZDK Miralem Galijašević, Minsitar za rad, socijalnu politiku i izbjeglice Nurdehan Šahinović, Željko Bodul pomoćnik ministra ispred Ministarstva za obrazovanje, nauku, kulturu i sport, Mladen Perić predsjednik Udruženja poslodavaca ZDK, Branka Janko predsjednica Razvojne agencije iz Žepča, menadžment Službe i svi šefovi općinskih biroa rada ZDK. U veoma konstruktivnoj diskusiji i radu u više od četiri sata tematski su bila obuhvaćena dva segmenta rada Službe.

U okviru prvog dijela sastanka direktor Kelavić je sa šefovima općinskih biroa napravio kratak osvrt prethodno realizovanih posjeta prostorijama svih biroa rada i evidentiranju stanja. Nakon toga su načelnici odjeljenja Službe izložili svoje prijedloge i instrukcije s ciljem unapređenja saradnje svih odjeljenja. Posebna pažnja je posvećena promociji web stranice Službe koja je od svih prisutnih prepoznata kao svijetla tačka u modernizaciji i otvaranju Službe prema javnosti. Svi šefovi općinskih biroa su dali analizu svog prošlogodišnjeg rada i iznijeli planove za 2016. godinu.

U drugom dijelu sastanka, premijer Galijašević je u svom obraćanju izrazio spremnost da podrži rad Službe kao dio povoljnog poslovnog ambijenta koji treba da bude produktivan i otvoren prema onima kojima je najpotrebniji a to su nezaposlene osobe. Direktor Kelavić kao i predsjednik Upravnog odbora Emir Džafić su potvrdili da se ulažu veliki napor u poboljšanju rada Službe u saradnji sa lokalnim vlastima i poslodavcima, zato što je to jedini put da se dođe do zajedničkog cilja. Ministar Šahinović kao i g-din Bodul su ponudili potpunu saradnju, otvorenost za proširivanjem spektra aktivnosti i inicijativa koji bi bili poduzeti zajedno sa Službom a kako bi se riješili gorući problemi na koje nailaze nezaposlene osobe na putu ka zaposlenju.

Spremnost za daljnju ali kvalitativno na većoj razini podignutoj kooperaciji između poslodavaca i Službe je potvrđena i od strane predstavnika Udruženja poslodavaca ZDK i Razvojne agencije iz Žepča koji sa velikim entuzijazmom podržavaju zajedničke napore i spremni su da daju svoj doprinos u smanjenju broja nezaposlenih na području našeg Kantona. Definitivno web stranica je naznačena kao mjesto koje će poslužiti svim akterima u ciklusu zapošljavanja (poslodavci sa svojim oglasima, nezaposlene osobe sa svojim biografijama, Služba sa svojim informacijama o aktuelnim dešavanjima) da ostvare interaktivan odnos.

Sastanak je od strane svih prisutnih ocjenjen kao veoma uspješan i konstruktivan, a direktor Kelavić je naglasio da nastavlja dalje sa svojim radom na poboljšanju i promociji slike Službe kao institucije koja će nadalje biti primjer rada i odgovornosti ka najosjetljivijoj kategoriji socijalne populacije a to su nezaposlene osobe.





